



Tir Yimyim

www.tiryimim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimim@gmail.com



TAPAK 8

Afghanistan nung aliba US sepaitem
Christmas mapang kidang alitsüla: Trump



TAPAK 3

Bodo oshi ya Assam indang
associate oshi asütsü: Himanta

VOL. XVIII NO. 02 (ADOK 02) DIMAPUR

ROGONÜ (FRIDAY) MONGPUTENI (OCTOBER) 09, 2020

₹ 5.00

Nagaland COVID-19: Nisung 66 taneptsünguogo

Kohima, Mongputeni/October 08 (TYO): Nagaland nung Brestobarnü nisung tasen 21 dak novel coronavirus jangjateta tang state nung iba tashidak agi nisung 6,736 mener alitsü, aser kasa mapang nisung 66 taneptsü ngua tang tashinung iba tashidak nungi taneptsü angur ajak senteper nisung 5,510 alitsü, ta State Health department ketdangsertemi ashi.

"Tanü nisung 21 dak COVID-19 positive jangjaget - Kohima nungi 17, Dimapur nungi ana aser Peren aser Mon nungi kaka," ta Minister, Health and Family Welfare, S Pangnyu Phom-i Twitter nung metetdaksü.

Kasa mapang nisung 66 taneptsü ngur kidang yokogo - Kohima nungi 59 aser Dimapur nungi 7, ta paisa ashi. Iba atema Minister-i frontline worker aser Integrated Disease Surveillance Programme team temi state nung iba virus anema anibelem mesasai raraba atema tenüngsang agütsü.

Nisung 1,149 active lir aser item rongnung nisung 50 dak iba tashidak agi kangshiba terara lir, Kohima nung ka kanga mejungi kangshir aser Dimapur nung ana ventilator teyari amshia lir, ta Additional Director, Health Department, Dr Denis Hangsing-i ashi.

State nung tang tashinung COVID-19 agi menepa alir nisung 23 süogo, saka nisung 12 dang coronavirus agi asü aser pongu danga tashidak den temeyoktep agi asü aser trok asüba jangjatsü asoshi

bushistingdangba mapang lir, ta pai ashi.

Ajak senteper COVID-19 agi shiranger nisung 54 tashi danga state-i belener ogo, ta paisa ashi.

State nung COVID-19 agi shiranger taneptsü anguba rate ya shilem 81.79 alitsü.

District telemsa nung iba tashidak jangjateta ya Dimapur nung nisung 3,537, Kohima nung nisung 2,150, Mon nung nisung 395, Peren nung nisung 283, Zunheboto nung nisung 123, Tuensang nung 108, Mokochung nung 55, Phek nung 36, Wokha nung 26, Kiphire nung 12 aser Longleng nung 11 alitsü.

Nagaland nung COVID-19 ya sepai 3,154, danga state nungi meyipa shilanger 1,540, tsüngsü apuba nung 1,681 aser Frontline Worker 361 dak jangjateta lir, ta Dr Denis Hangsing-isa ashi.

District shia active cases yamai alitsü: Dimapur - 739, Kohima - 274, Mon - 81, Tuensang - 31, Mokochung - 11, Peren - 11, Longleng - ka aser Wokha nunga ka.

Taneptsü angur nisungtem Dimapur nungi 2,748, Kohima nungi 1,867, Mon nungi 305, Peren nungi 272, Zunheboto nungi 120, Tuensang nungi 77, Mokochung nungi 44, Phek nungi 35, Wokha nungi 26, Kiphire nungi 12 aser Longleng nungi pezü alitsü.

Tang tashinung state nungi COVID-19 tashidak tendangtsü asoshi temolung melemtetba sample 84,033 yoka lir, ta ketdangseri ashi.

Ao Oshi renlokdahtsütsü toktep nung tanur 72-i shilem agi



Dimapur, October 08 (TYO): Ao oshi renlokdahtsütsü asoshi tanurtem rongnung Online ajanga toktepdaksüba sentong nung arishi küm 4 nungi 16 tashi nung tanur ajak agi neteranati shilem kanga junga agiogo. Iba Ao Oshi Renlokdahtsütsü Toktep-I sentong ya Mokochung nung nübertem nem angati kakat züngdahtsütsü asoshi lapokba kakatnang, Bookipedia aser Tir Yimyim na longjemer ayongzükba liasü.

Iba sentong nung arishi küm 4 nungi 8 tashi purtem nem A,B,C (A-ü) aser 1,2,3 (1-100) züngdangtepdahtsü aser arishi küm 8 nungi 12 tashi purtem nem kentula (nursery rhymes) tentepdahtsü aser ano arishi küm 12 nungi 16 tashi purtem nem tar nunger otsü

shitepdaksü. Item rongnung takokertemji alphabets aser züngdangba züngdangtepba nung mezüng takok jenjangji Talisunep Jamir (Molungyimsen), tanabuba takok jenjangji Sanglipong Imsong (Yaongyimsen) aser tasembuba takok jenjangji nisung ana, Merennüksüng (Mopungchuket) o Imsumen Longkumer (Nükshiyim) nati angur.

Kentula tentepba nung mezüng takok jenjangji Olander Longkumer (Ungma), tanabuba takok jenjangji Moazüngla Longchar (Chungtia) aser tasembuba takok jenjang nisung anati, Yimsüaro (Mongsenyimti) o Tiamenla (Süngratsü) nati angu. (Maneni tapak 2 nung...)

Kohima nung Election Awareness Workshop agi



Hotel Japfu, Kohima indang Conference Hall nung October 8, 2020 nü print & electronics media den State level awareness workshop agidang Chief Electoral Officer, Nagaland, Abhijit Sinha IAS ajanga jembiba noksa nung angur.

Dimapur, Mongputeni/October 8 (TYO): Nagaland Legislative Assembly By-Election dak sendakba nung EEM, EVM, VVPAT, MCMC aser Media dak sendakba ken o tem dak ajemdaker State Level Awareness workshop ka print/Electronic den October 8 nü Hotel Japfu Conference Hall, Kohima nung agiogo.

Chief Electoral Officer Nagaland Abhijit Sinha, Additional CEO N.Moa Aier, Deputy CEO Awa Lorin aser Deputy CEO R. Mhathung nung Election Expenditure Monitoring (EEM) Paid News/Fake News, MCMC & EVM/VVPAT onük nung ajemdaker jembi.

Shisalen agütsürtemi, election nung sen intokba junga asadangtsü aser sen intokba

meimshiba ajanga election nung shilem magitetsüsa akümtsü ta candidate nem metetdaksütsü aser pei vote atema sübokrem agiba ya temzüng ozüng alema lir ta nübertem nem metetdaksütsü asoshi election monitoring koda tongtibang, iba indang lemsatempa liasü.

Maneni parnoki election nung sen intokba tapu balala indang jembiba. Sen intokba tapu balala rongnung temzüng ozüngi melaba ama lokti senden, poster, banner aser gari amshiba nung sen intokba densema lir aser ano temzüng ozüng alema vote agütsütsü purtem atsüa arutsü atema sempet, sen, yi aser tanga osettsüt agütsüba nung sen intokba densema lir, koba election expenditure monitoring, provision of Indian penal code, 1860 aser

expenditure monitoring machinery dak sendakba nung temzüng ozüng tsütsü kanga tongtibang lir.

Election Observer, CEO-isa, lokti senden, rally dak sendakba nung jembiba aser ashiba agi, lokti senden/rally ayongzükba agütsü atema temelaba meshitsü asoshi Annexure-16 nung inyakym benoka lir. Maneni shisalen agütsürtemi Paid News/Fake News aser osang teyazü, Certification, Media certification & Monitoring Committee (MCMC) inyakym aser jenjang balala nung parnok shilem, EVM & VVPAT, premium PSUs, BEL & ECIL ajanga secure Development & Manufacturing, linük tekümzükbba aser security dak sendakba nung sensitive equipment yangluba, EVMS/VVPATs tekümzükbba kübok achaayangtsüba indang metetdaksü.

Chief Electoral Officer Abhijit Sinha aser Additional Chief Electoral Officer, N.Moa Aier nati, lokti nung ken o balala adokba indang nübertem nem metetdaksütsü asoshi osangbenertemi tongtibang shilem agir ta shia parnok dang telok ka mejeta pumesemi teyongtsü nung inyaksangshitsü aser nübertem nem shisatsü agütsür shilem agütsü ayongzükba liasü.

CSS tesayurtem onük nung sorkari kaketshir tentet den senden amentsü

Kohima, October 08 (TYO): SSA aser RMSA tesayurtem (2010 aser 2013 batches) regularization atema takhangba agüja Nagaland nung kaketshir tongti tentetemi anogo telatetba kecha makai longkak aittsü atema anogo pezü dang anünga lia state sorkari Chief Secretary level nung Hokolbarnü sorkar department aser kaketshir tentettem külem senden ka amentsü ayongzükogo, ta ketdangsertem osang ka ajanga metetdaksü.

Nagaland sorkari CSS kübok SSA aser RMSA tesayurtem state School Education cadre nung anioktsü atema maparen inyakdar, ta nenshia metetdaksüba den külemi kaketshir tentettem dang October 12 nungi longkak aittsü sentong

alibaji thinenang ta mepishigo.

Naga Students' Federation (NSF) aser Eastern Nagaland Students' Federation (ENSF)-i 2010 aser 2013 batches SSA aser RMSA tesayurtem regularize süjang ta takhangba agüja anogo telatetba kecha makai longkak aita sorkar garitem senzüba nokdangtsü, ta sangdongba sülen anogo trok lir sorkari iba senden ya ayongzükter.

Brihostibarnü Special Secretary to Govt. of Nagaland, Kevileno Angami-i sangdong ka ajanga, SSA aser RMSA tesayurtem (2010 & 2013 batches) School Education Cadre nung adentsü atema inyakba maparen asadangtsü atema Mongolbarnü Nagaland Chief Secretary, in charge, J. Alam, IAS-i iba dak sendakba

Departments ayongzükba senden ka menogo, ta metetdaksü.

State sorkarisa, sorkar mapa inyakertem indang inyakym onük ka anema longkak aibaji tatishitsü tajung ka masü, kechiyong ibaji ajanga nübertem timtemtsü aser public service kongshitsü, ta metetdaksü.

Ano külen sorkari mepishiba dak sendakba nungbo ENSF-i kecha memetetdaksü saka, tang tashi parnoki official süa osang kecha mangu, ta ashi. NSF Tir, Ninoto Awomi-i, sorkar telangzüba agi parnok melung masür, ta ashi.

Hokolbarnü Chief Secretary level nung sorkar department aser kaketshir tentettem tsüngda senden ka mena iba onük nung o lemteptsü, iba sülen ang ano maneni telemtetba agütsü, ta Awomi-i metetdaksü.

Union Minister Ram Vilas Paswan süogo

New Delhi, Mongputeni/October 8 (Agencies): Union Consumer Affairs Minister Ram Vilas Paswan shiba tawa temulungjang surgery agia liasü pa tanü New Delhi nung mozüki ka nung süogo. Arishi küm 74 Tain minister dak ajungbena timtem ka adokba ajanga pa iba mozüki nung temang anepalua



Ram Vilas Paswan (File photo)

liasü, ta par jabaso Chirag Paswan-i Honibarnü tweet asü.

"Oba na joko iba lima nungi pilaogo, saka na kolen ledir liaka kü den teti alitsü ta ni metet. Oba ni na kanga menunrar," ta Chirag-i tanü nikongtsütsü tweet asü.

Paisa tebu tena tangokba noksa tejen ka lemsatempa liasü.

CORONAVIRUS WARAA SENOK LONGJEMER AKOKTSÜ ASOSHI -

Akok tashi lokti mesenteptsü merangang. Mepaidoktetba maparen kar ajanga senteptsüsa kümra, nisungtem tsüngda tepila lia amentsüla, teni tebang nembangka mask agütsüla, mopong peria arudaksütsüsa kishi aser kichiba jungjunga lapokang aser mapang tatsüka dang agiang.

- In collaboration with the Media Cell, RD department, Nagaland

Election atema 'Star Campaigners' inyakyim melenshir

Dimapur, Mongputeni/October 8 (TYO):Election Commission-i, September 25 nü Bihar Legislative Assembly General Elections aser September 29 aser October 5 nü state balala nung Bye-Elections agitsü sangdongogo.

August 8 nü Commission-i, political party balala aser state/UT Chief Electoral Officer tem nungi shisatsü agiba sülen COVID-19 wara pokteter aliba mapang election inyakyim dak sendakba nung guideline agütsüogo. Item guideline tem ya ayimsünga prokshio go aser https://eci.gov.in/files/file/12167-broad-guidelines-for-conduct-of-general-electionby-election-during-covid-19/ nung angutsü.

Bihar nung General Elections agitsü atema renemshiba asadantsü asoshi Commission-i Sept 29 nungi Oct 1 tashi state semdangba mapang, National aser State Political Party balala (30.09.2020, 10:00 ako nungi 12:00 ako); Chief secretary, ACS(Home), DGP; Chief Electoral Officer, District Election Officers aser Superintendents of Police densema state nung Officer tejentem den sensaksema liasü.

Iba mapang district ketdangsertemi Commission dang nüboyimba sentong agitsü atema tesemtem shimogo aser COVID dak sendakba nung inyakyim tem temulundang yur, constituency ajak nung nüboyimba sentong nung nüburtem nem shilem agidaktsütsü asoshi Commission tetuyuba nung tang inyaktep dar aser item osangtem ya election mapang nüboyimba sentong

balala atema Chief Electoral Officer, Bihar-i media ajanga prokshidar, ta ashi.

Kasa inyakyim ya bye-election agitsü aliba constituency tem nung election ketdangsertemi benoka inyakdar. Sept 14 aser 15 nü Commission kübok ketdangser tejentemi Bihar semdanga Patna, Muzaffarpur, Bhagalpur aser Gaya nung election atema renemshiba asadango go. Iba dak alia Commission aser ketdangsertemi state mesemdang tsünga Chief Electoral Officer, Bihar aser District Election Officers aser Superintendents of Police tem den virtual senden aika ayongzüka menogo.

Maneni Commission-i Bihar semdangba mapang, 'Star Campaigners' temi tesem balala semdang dang nübutem aika adenshiba ken o metetdaktsüogo. October 1 nü Press Conference ka nung, iba amala sentong ayongzüka agiba aser talisa helicopters anenba mapang nüburtem aika sendenba dak sendakba nung health tsütsü tebilemtesü kaa ken o ashishia liasü. Iba ken o ya tanü maneni Commission nung sensaksemogo. Ken o ajak kanga junga asadango sülen wara pokteter aliba aser political party tem nüboyimtsü nungdakba angateta Commission-i 'Star Campaigners' dak sendakba nung inyakyim lepareprangshitsü telemtetba agia liasü.

Temalen shisema aliba onük dak ajemdaker COVID-19 wara pokteter aliba mapang election yimjung nung kecha

tebendam aser tetsükdaktsü makai agitettsü atema tang agitsü aliba election aser COVID-19 wara süshia mao tashi taruba election tem nung benoka inyaktsü atema 'Star Campaigners' dak sendakba nung inyakyim melenshitsuogo.

1. Wara pokteter aliba mapang recognized National/State political party tem nungi 'star campaigner' 40 melen 30 dang asütsü aser registered political party tem atema 20 melen 15 dang asütsü.
2. Iba dak ajemdaker 'star campaigners' list benoktsü atema anogo 7 aliba 10 kümstsüogo koba osang agütsüba anogo nungi azüngtsü. Political party shirnoki 'star campaigner' tem tenung agütsüogo parnok i atakzüka aliba mapang tsünga parnok indang list tanaben yanglulshitettsü.
3. 'Star campaigner' tem nüboyimba sentong nung shilem agitsü atema sentong metenzük tsünga ghonda 48 lia district election authority tem nungi temelaba agitsüla, ajita asünung dang election dak sendaka aliba lokti ajaki tenüngdakba maparentem benoka inyakettsü.
4. Iba tetuyuba ya media ajanga prokshitsü aser National/State/ aser tanga political party tem nem metetdaktsütsü tuyuogo Inyakyim melenshiba osang ya osang agütsüba anogo nungi benoka inyaksangshitsü, ta ketdangser sangdong ka ajanga metetdaktsü.

Helicopter service Oct 12 nü nungi tenzüktsü

Dimapur, Mongputeni/October 8 (TYO): State sorkari October 12 nü nungi district headquarter tem tsünga hopta shia senzüba helicopter service tenzüktsü telemtetba agiogo.

General Manager, Nagaland State Transport, Er. Atovi Kiba Sema-i sangdong ka ajanga, mask, face cover, sanitizer

amala tenüngdakba osetem nung sen intokba mesemtsü atema menden shia sen talila 300 ajungketer helicopter service tenzüktsü ta metetdaktsüogo.

Passenger tem tayimtsü nung tua mamen tsünga medical officer temi countersign sür, True Nat/ Rapid Antigen Test/ RTPCR

ajanga agütsüba Covid-19 negative report sayutsü nungdaker, ta kasa sangdong ajanga metetdaktsü.

Paisa, nüburtem ajak ajangzüksü mechi helicopter service achayangba mapang sorkari tetuyuba agütsür aliba sülen anidaka inyaksangshitsü atema operating unit tem dang mepeshia metetdaktsüogo.

Chief Electoral Officer-i tetuyuba agütsü

Dimapur, Mongputeni/October 8 (TYO): 14-Southern Angami-I and 60-Pungro- Kiphire nung bye elections agitsü aliba dak sendakba nung Chief Electoral Officer, Kohima Nagaland-i tetuyuba kar agütsüogo.

Tetuyuba nung, 'Offence of Booth Capturing' dak sendakba nung Representation of the People Act 1951, Section 135A

kübok booth amokbangtsü merangba ya ozüng alema lir aser tepuokdaki yoka merenshitsu shia lir, koba küm ka dak tekübok masütsü aser küm asem tashi atsülangtsü akok.

Candidate/political party ka pusama yimtsüng/ward/khel mesera lokti temi nüburtem nem metetdaktsüba aser electronic/print media amala ajanga yimjak nung osang sangdongba ya

temalen shisema aliba provisions anema lir.

CEO-isa, election sadem sadema tesunep nung tebandang aser tetsükdaktsü makai agitsü asoshi yimtsüng, kiyong, loktitentet mesera media house kari danga temalen shisema aliba onük nung aibelenba ngutetra, aibelenertem anema temzüng ozüng kübok jenang tapet agitsü, ta metetdaktsüogo.



October 07, 2020 nü 27 Mokokchung Town Mandal pur mezüng executive senden amenba mapang 27 Mokokchung Town Mandal ketdangser aser BJP Mokokchung district nungi ketdangsertem külemi tangokba noksa ka yangi angur.

Angh Ravi-i asükhulemsatep

Dimapur, Mongputeni/October 8 (TYO): Taoba Nagaland Angh, Dr. Ashwani Kumar, October 7 nü Shimla nung asüba osang angazüka kanga aoksaba aser temulung korema bilemba Nagaland Angh R.N Ravi-i lemsatepogo.

Pa kanga dang professional aser kanga nisung tajung ka liasü. Pai lokti aser nüburtem atema mapa tajung inyakba teti menungra bilemettsü. Dr. Ashwani Kumar-i lenla balala nung linük tenzüka aruogo. Pa Nagaland Angh liasü aser iba den pai Director of Central

Bureau of Investigation, Director General of Police, Himachal Pradesh, Chancellor of APG Goyal Shimla University amala tongtibang mapa aika benogo, ta Ravi-i ashi.

Nagaland nung aliba nüburtem aser Nagaland Raj Bhavan kibong aser kü tenung nung asür kinungertem den asükhulemsateper. Iba amala mangyim jashi mapang tulusang Tsüngremi parnok nem tashi aser anisüngzüak agüjang ta sarasademtsü, ta kasa sangdong ajanga metetdaktsü.

Nagaland nung Durga Puja benjong atema totuyuba agütsür

Dimapur, Mongputeni/October 08 (TYO): Durga Puja benjong nung shilem ka ama küm shia state nung aser talisa Dimapur nung aliba temples (mandir) aser nüburtemi amshiba tesemtem nung Durga aser danga süngyanglutem dener ki (pandals) yanglua amshir.

Tesem kar nung iba amala ki temeket nung fairs aser osettsüset balala ayokba stall tem amenoker. Pandals aser iba amala tesemtem nung teti nisung lokti adenshiba angur, anungji tang COVID-19 tensa mechi iba Durga Puja benjongmung mapang iba tashidak prokshia aoba nungi nokdangtsü asoshi mera balala agitsü nungdaker. Anungji iba atema Nagaland state tesem ajungalen atema Home Department ajanga teinyaktsü/ totuyubatem yamai agütsür:

- a) Puja pandals tem ya temples (mandirs) tem nung dang amenoktsü melatsü aser lenmang mesüra tesem kecha nunga khen atema pandals tem yanglua amenoktsü memelar.
- b) Tamangertemi pandals tem semdangtsü asoshi anepdang 5:00 ako nungi aonung 10:00 ako tashi dang alitsü.
- c) Puja pandal tem nung aser temeket nung Mela/Food Stall/Stalls kecha mamenoktsü/melapoktsü.
- d) Puja pandals nung mashi mapang putir aser sentong ayonger densema nisung timtiba agi 30 dang melatsü.
- e) Face cover/mask aser teka meshidok/sanitize masüba nisung shinga puja ayonger temi maitdaktsütsüla. Puja agiba tesemi aidak teka shidokba/sanitizer ayutsü ya puja ayonger temi

- f) Tamangertem nem 'wet prasad' lema magütsütsüla.
- g) Benjong aliba tesem melapokdang aser shibangba sülen aser anüngdang ghonda trok shia sentong ayonger temi tesem sanitize asütsüla.
- h) 'Immersion procession' khenyongi memelatsü. Tsü nung süngyanglu indokba mapa inyaktsü asoshi timtiba agi nisung 10 melatsü.
- i) Puja aliba tesemi arur ajak puja ayonger temi thermal scanner amshia temang tendangtsüla aser COVID-19 dak sendakba symptom alir shinga puja pandals telungi aittsü memelatsüla.
- j) Puja pandal semdang kar dak COVID-19 ali ama temolung melemtetsüsa lira, sorkar meyong anasatiba medical facility nem osang agütsütsü aser anasatiba COVID-19 treatment centre-i anir aotsü asoshi puja ayonger khuret asütsü.
- k) Arishi küm 65 dang tainba, tanur arishi küm 10 teküboklen, danga tashidak balala agi shiranger aser masha tsürtem puja pandals-i maotsü ajungshir.

District nung puja committees/tayonger nem pandal inoktsü atema district nung ketdangsertemi temelaba agütsüba den bendenloksema taküim item atema temelaba ya Deputy Commissioner tekolakba sür aliba District Task Force ajanga agütsütsü. Tzü nung süngyanglu inoktsüba mapang lokti madenshitsu mechi DTF aser puja committee/tayonger temi nungdakba achayangtsüla. Item teinyaktsü/totuyuba nung aibelener nem tapet temerenhi agütsütsü.

Ao Oshi renlokdaktsütsü... (TAPAK 1 NUNGI...)

Ano, tar nunger otsü shitepba nung mezüng takok jenangji Imsupongla Longchar (Chungtia), tanabuba takok jenangji Jungjenna Jamir (Akhoya) aser tasembuba takok jenangji nisung ana, M.Wangshimongla (Kupza) o Imotzüik (Mongsenyimti) nati angu.

"Ao kentula aser English nursery rhymes mejemba ya tangatetba kasasa nung mejema lir ta angatetba kaji, English kentula nung "Rain, rain go away.' ji asen Ao kentula nung, " Tsünglu, Tsünglu..." ta aser "Twinkle , Twinkle Little stars..'ji " Ya shir ita..."

ta asüba kentula den kasasa lir. Itemji medemdanga tanü asüng tesayur aser tsüraburtemi tanurtem dang asen oshi nung kentula jangratema sayutettsü," ta iba Ao Oshi Renlokdaktsütsü Toktep sentong ayongzükertemi angatetba ka metetdaktsü.

Iba sentong nung takok angurtem nem senpet sen 10,000, 5,000 aser 3,000 den konang kaket agütsütsü.

Item takok angurtemi shilem agiba video Tir Yimiyim YouTube aser Bookipidiamokokchung Instagram nung angutsü.



Shillong, October 8: Headquarters Eastern Air Command, Shillong nung October 8 nü 88buba Air Force Day mungogo. Iba anogo Air Marshal Amit Dev AVSM VSM, Air Officer Commanding-in-Chief, Eastern Air Command-i achayanga sepaitem tenangzüktepa agi aser wadang balala nung takok tajung nguteter aliba air warriors aser civilian tem nem tetushi agüja liasü.

Bodo oshi ya Assam indang associate oshi asütsü: Himanta

Guwahati, Mngputeni/October 8 (Agencies): Bodo Peace Act nung sign asüba sülen ita teku lir Assam sorkari Bodhbarnü Bodo oshi ya state indang associate official oshi asütsü, ta sangdongogo.

Cabinet-isa, 6th Schedule tesem adena orr aliba Bodo nungertem atema Bodo Kachari autonomous welfare council ka amenoktsütsü asoshi telemtetba agiogo.

Iba telemtetba ana ya January 27 nü Centre, Assam sorkar, Bodo nunger telungpur

telok pezü aser Bodo nung lokti tentet ana tsüingda tenangzüktepa yangluba nung shilem ka lir.

Assam health, finance and education minister Himanta Biswa Sarma-i Twitter ajanga, "state cabinet-i tongtibang telemtetba ana agiogo. Bodo oshi ya Assam state associate official oshi asütsü. Bodo nunger tem ajangzüksü atema 6th Schedule tesem küboki maitba tesemtem atema Bodo Kachari autonomous welfare council ka amenoktsütsü," ta ashi.

Temetetsükaji September ita state sorkari Baksa, Kokrajhar, Udalguri aser Chirang districts densema Bodoland Territorial Areas District (BTAD) arrtsü yanglushitsü atema commission ka tentetba sangdongogo. Iba telemtetba ya accord nung clause tem rongnung tongtibangtiba ka liasü.

Iba tenangzüktepa yangluba sülen BTAD dang accord kübok clause tanga ka nung shisema aliba ama Bodoland Territorial Region (BTR) ta jaa arudar.

IPFT-i October 15 nü tribal area tem mokdanga ayutsü lemtet

Agartala, Mongputeni/October 8 (Agencies): Tripura nung BJP den longjemer aliba party, Indigenous People's Front of Tripura (IPFT)-i Bodhbarnü Tipraland state balaka akhangba densema tanga takhangba balala atema Tripura Tribal Areas Autonomous District Council (TTAADC) tesemtem ghonda 24 mokdanga ayutsü sangdongogo. Iba sentong ya October 15 anepdang 6:00 ako nungi tenzüksü aser October 16 anepdang 6:00 ako nung tembangtsü.

Agartala Press Club nung press conference ka agiba mapang IPFT assistant general secretary Mangal Debbarma-i ashiba agi, October 2 nü IPFT central executive committee senden 13buba amenba mapa iba telemtetba ya agia liasü.

"IPFT general secretary aser Tribal Welfare minister Mevar Kumar Jamatia-i anir MLA

pezü iba ita hopta tanabuba nung Delhi-i aotsü," ta Mangal-i ashi.

Lenirtemi Delhi semdangba mapang Ato Kilonser, Union home minister aser BJP national tir JP Nadda den ajuruteptsü sentong lir.

Paisa, IPFT kübok lokti tentet balala ajaki October 15 nü lisopur atema state balaka khanga ghonda 24 mokdanga ayuba nung shilem agitsü, ta ashi.

"TTAADC tesem mokdanga ayutsü asoshi telemtetba agiba ya Tipraland state balaka kümtettsü, Tribal Welfare dak sendakba nung High Power Modality Committee osang tejangja sangdongtsü aser ADC nem tashi agütsütsü atema Parliament nung 125th Constitution benoktsü asoshi akhangtsü atema lir," ta Mangal-i ashi.

TTAADC nung taruba election indang jembiba mapang

IPFT assistant general secretary-i ashiba agi, election nung kija tokteptsü asü menden lemsar tokteptsü, iba dak sendakba nung tang tashi tatemangbuba telemtetba ka agia mali. Paisa, party nung lenirtemi party den sendaktepa alirtem den sensak asema sülen telemtetba ka agitsü, ta ashi.

Tripura nung teloktep sorkar nung BJP aser IPFT na longjemer lir aser parnoki 2018 küm general election nung CPIM tsükdakja liasü.

State assembly nung menden 60 nungi BJP-IPFT teloktep sorkari menden 36 akok, kong IPFT party menden 8 aser opposition CPI-M-ia menden 16 kokteta liasü.

January ita 12buba Tripura Legislative Assembly sixth session nung Tripura Tribal Areas Autonomous District Council (TTAADC) nung menden 30 aliba 50 kümdaktsütsü asoshi telemtetba agia liasü.

Tripura nung COVID-19 agi asür 301 jungogo

Agartala, Mongputeni/October 8 (Agencies): Tripura GBP Hospital nung Covid-19 agi shiranga alir asem asüba sülen state nung iba tashidak agi asür 301 jungogo, ta ketdangsertemi Brehostibarnü metetdaksü.

Ajisüaka source balala ajanga ashiba agi, state nung unofficial COVID-19 tasüba 312 jungogo, koba sorkari memetdaksütsü asoshi telemtetba agi.

Taoba ghonda 24 tsüingda

sample 2156 tendangba nungi nisung 202 dak COVID-19 tashidak potetba jangjaogo.

State nung tang tashi nung nisung 27,545 dak tashidak potetogo aser item nisungtem rongnungi tang nisung 4175 tema anepalu testüdak lir aser nisung 23,043 anepogo.

Kasa mapang nung Tripura sorkari antibody level asadangtsü atema October ita tanabuba hopta nungi sero surveillance tenzüksü atema telemtetba agiogo.

Private mozükitemi COVID-19 agi shirangertem anepalu mesüner: Tynsong

Shillong, Mongputeni/October 8 (Agencies): Meghalaya nung private mozükitemi COVID-19 agi shirangertem anepalutsü memulungba osang angazükba sülen state sorkari health department dang state nung private mozüki ajak den lepa reprangshiba senden ka ayongzükba agitsü atema tetuyuba agütsütsü akok.

Meghalaya deputy chief minister Prestone Tynsong-i ashiba agi, private mozükitemi COVID-19 agi shirangertem ajak NEIGRIHMS nung oa temang anepalutsü tetuyuba agütsür.

"State nung COVID den rara nung Private mozükitemi shilem agitsüla aser pei khuret tangar nem belenzüka metoktsütsüla," ta Tynsong-i ashi.

Sorkari iba tebilemtsü ya private mozükitem den senden

amentsü asoshi ayongzükter aliba nung bentettsü imlar.

Tawa sorkari entry points ajak nung Rapid Antigen Test (RAT) agidaktsütsü asoshi telemtetba agiba dak sendakba nung Tynsong-i, Indian Council of Medical Research (ICMR)-i tuyuba sülen state anidaker, ta ashi. NEIGRIHMS director-i state arrtsü nung antigen tests agiba ya amajok dang, ta ashiba sülen Tynsong-i iba telangzüba agüja liasü.

"Ketdangsertemi COVID agi shirangertem potetyonga aoba inyakyim nung mapang mintoktsü atema RAT amenoktsüla ta ashir, anungji tashidak tendangtsüsa akümer," ta paisa ashi.

Tynsong-isa, ICMR aser Ministry of Health and Family Welfare tetuyuba sülen state sorkar anidaktsü nungdaker, ta shisem.

COVID-19 den rara nung Manipur-i sen crore 60 intokogo

Imphal, Mongputeni/October 8 (Agencies): Manipur chief minister N Biren Singh-i ashiba agi, tanü tashi nung COVID-19 den rara nung state-i sen crore 60 intokogo.

Sen timba COVID-19 tendangba, quarantine centre tem amenokba, district ajak nung COVID-19 care centre tem amenokba aser linük mokdang aliba mapang tanga state nungi arurtem nem teyari agütsüba nung intoka liasü.

Singh-isa, senotsü tsütsü tetsükdaktsü adokaka wara den raratsü asoshi takok tashi inyaktsü, ta ashi.

Chief minister-i ashiba agi, rapid antigen testing kits 40,000 Bodhbarnü state tonga aruogo. Sorkari RAT kits 50,000 meka liasü.

State nung aliba nüburtemi wara den ajak longjemer shisa kaa nokdakogo, ta shi Singh-i healthcare workers, volunteers, lokti tentet balala, local lenirtem aser police dang kanga pelaba lesatepa liasü.

Mannei paisa, sorkar aser nüburtem longjemer inyakba ajanga COVID-19 positivity

rate 4.77 dang kümogo, koba national average dang nungi kanga agi tajemba lir. State nung fatality rate 0.64 per cent lir, koba national average dang nungi tajemba lir. Manipur nung nütsünyongzük million ka nung nisung 90,156 dak tashidak tendangogo aser iba ya-a national average dang nungi timba lir, ta ashi.

Mesen dak sendakba nung ken o tali jangjaa akümba dak ajemdaker Singh-i ashiba agi, tashidak keta alirtem pei kidang temang anepalutsü atema ministry of health and family welfares (MoHFW)-i agizükogo aser state aika aser alima nung linük aikati iba inyakyim benoka inyakdar.

Manipur nung COVID-19 agi shiranger parnok 600 shi-i kidang temang anepalutsü asoshi telemtetba agiogo.

Kasa mapang nung sorkari shirangertem anepalutsü atema COVID-19 care facility 35 achayangdar, kong COVID-19 referral hospitals ana; JNIMS aser RIMS, state-level CCC ana, district-level CCC 17, isolation ward 14 densema lir.



Guwahati, October 8: Transport associations-i commercial vehicle tem taa ajungkettsütsü khanga Hombarnü 5 ako nungi inyaksangshi masütsü telemtetba agiogo. All Assam Motor Transport Association (AAMTA)-i iba sentong ayongzükba ajanga state ajung nung nüburtem kanga kangshitepdar. Kasa mapang nung Transport minister Chandramohan Patowary-i, wara pokteter nüburtem timtem nung aliba mapang bus nung senzüba taa tali ajungkettsütsü makoktsü, ta shiogo.



TIR YIMYIM YIMOBILEM (EDITORIAL)

DIMAPUR ROGONÜ, MONGPUTENI(OCTOBER) 09, 2020

Ao angazük tenzükshitsüla

Tia ajung, Tsüngremi kanga saklokba agi asenok Aortem küm 150 jakdang azüng zülu kecha memeteti lia, America lima nungi taküm ajak bendanga agüja itasa ita agia tzüim ajanga rong nung aruagi asenok dang azüngtsü aser zülutsü sayuba anogoji asenok Ao kin nüchi anguba anogo liasü. Iba anogo nung jagi tenzuka azüng aser zülu metettsübaji Aotsürtemiang tejangraba aser teburtemiang tangazüknüba ta khen nung azüngtsü aser zülutsüji Ao lima ajaklen sayu aser angazük. Iba anogo nung jagi yong amshia dang anogo aser mapang sükdanga aliba 1,2,3 zülutsü tenzük aser temulung nung dang otsüolem ajak rema aliba kaket nung züluoka ayutsü meteta aküm. Iba mapang asenok tsüraburtemi mezüng anguba aser azüng tenzükba kaketji Laishiba dang liasü, anungji jokorla peisasa Lashiba züngteta aküm aser memenui Ao oshi nung Laishiba meyiptsü tenzük. Ano, asenok dak tajung kaji, pei shia metetbaji tatem masü saka tangar nema angazükdaktsütsü tejangraba liasü, anungji mezüng azüng aser zülu metettertemi kari angati aser kari ita sen tila agia tesem balala nung kaketreju lapoka alidak sayutsü tenzük. Atangji, shiruru ama liasüba tia nungi America nungertem dang nungi A,B,C aser 1,2,3 azüngtsü aser zülutsü angazüker asünungji, America nungertemi adokba olasü kasajibo mangazüktet südi. Iba jagi tang tashi asenok Aortem English nung Roman alphabet azüngdang English nungertemi adokba ama olasü shitak madoktetba timtem lir. Tanü asenok asen tetsü oshi asentenshidakja renlokdaktsütsü merangba mapang nung ya item tashimait aser mekomeintemji metongshia tajungba aser shitakba küma tenzükshitsü asoshi Bookipedia o Tir Yimyim na longjemer Ao Oshi Renlokdaktsütsü Toktep-1 sentong ka ayongzüka agiogo. Iba tetoktepba nung tanur tajung neterana tashi agi shilem agiogo. Parnok rongnung koba shimer, koba meshim, ajak tajung dang liasü. Ajisüaka, toktepba sentong asünungji tajungertem rongnung tajungtiba shimogo. Ajisüaka, par neterana pronglai shilem tajung agibaji Ao oshi angazük tenzükshiba mapa ka asütsü. Iba ama pei kidang tanurtem ajungshia pei tetsü oshi aser sobaliba angazükdaktsütsü meranga anepaluba asoshi tsüraburtem danga pelar. Joko taintem rongnung shirnoki A,B,C olasü shitak adoka mezüngteter aser shirnoki pei tetsü oshi junga mejembitetter aser mezüngtetter, itemjibo ojang, par-a par putu mapang nung angazükba agi yamaji dang liasü. Ajisüaka, tanüba alima ajunga nung pei tetsü oshi aser pei kin sobaliba asentenshiba mapang nung ya asenoka asen chirnurtemibo Ao oshiang tajungba, English nungang tajungba aser ano Hindi-bo pei tetsü oshi den kasasa jembir aser zülur ta litettsüsa, tang yongi pei kidang aser pei school aser pei arogo Sunday school nung pei tetsü oshi angazükdaktsütsü tim. Akhidangbo, pei tetsü oshibo ajaki jembitetter saka English-bo ishikati dang jembitetter ta liasü saka tanü asüngbo jet ta meyiptepogo, kechiyong English aser Hindi-bo ajaki jembitetter saka pei tetsü oshi-ang ajaki mejembitetter. Iba ama tensa mapang nung pei tetsü oshi ashibaji, pei medemertem dang nungi jenjang ka agi tali temetetba akümer asütsü. Asenok Americai ao nunga English ken ka tenang ta mashitsü saka Ao oshi nung sobaliba ken ka tenang ta dang ashitsü. Iba jagi, asenok alima tatem tashi aoyonga, Aorbo Aorsa asütsü, anungji Aor ama Ao oshi jembii ashitsüba ya kanga tenüngdaktsü ta rajemdaktsür.

OLEMSABANG TSÜNGREM MESÜKBA NUNG PAI NISUNG YANGLU

~ R. Takamanen, Kohima

(*Yashi adok nungi...*)

Saka ya meteti asenok meimchir ya kena masütsü amai temulung ulua alir saka asüba ya aseni mepilamba mapang ka nung ajurur. Aji asünung asenok taküm ya tanüla nung kanga shisa ka-a alitsü nungdaker. Temenen nung ken atsüngzüka alidang asen dangi tajaba agi menepa arura ajibo takoksa tulu rongnung atentsü.

Asen meimchir libaliro ya nisung ka nungi kati angazüktepa aoba yimya ka lir. Naga lima yamai mejungi akümba ya kong nungi tenzük ta bushidangtsü ibai mapang tajung ta bilemer. Education, tamangba yimsü aser libaliro ya tajung saka tamajung, saka asen Aori benshiba jilo benshia aliba, angazükba mapatem teimba lir. Asen Naga kin junga lira idakji asen kina shilem lir saka alima mejungi lira idakji asenok dena lir. Naga lima raksa-a aliba ya yanglushitsütsü ta bilema lira tenla kidang kisung melenshi agibo majungtsü saka tanüla nung kanga shisadanga kija aser kibong meyanglushira alima temenen ya makoktsü. Mekümdangra tamajungba lima akümtsü ana nung lir.

Asen meketa aliba tangar kin Aor dak shisa tajung ka imla kechiaser akidang asen kin dak yamaji keta liasü. Saka tanüba tangari imlaba ama shisatsü magütsüteter. Education nungi anguba shisatsüba lir saka Tsüngremi moatsüba shisatsü tajung ka sama-a aor amai bilemer. Asen tsürabur kaket shisatsü meliaka taoba mapang, tanü asen tarutsü tiya ajak ngujema jembia aru aji agi nübör tebilemstü makai ali. Tejen Lai mapang Eli putiri pai kibong temenen mazüoktetba ajanga Tsüngremi pa putir mapa nungi anentsü. Amelak amakdang Soul chubai Tsüngremi ashiba mangaba ajanga pa chuba mapa nungi agien. Alima nung chuba saka Tsüngremi shisatsü agütsüba kodang asenoki Tsüngrem anema temenen menadir item temoatsü ajak pai agiener ta Tsüngrem o ajanga jungkai adoka sayur

Tsüngremi shisatsü agi alima ya yanglu kechiaser shisatsü ya alima rongsen ajak dang nungi taoba, anungji alima lenir shirnok shisa aka parnoki alima tebur junga yanglur. Asen Naga lima ya Tsüngremi kanga junga yanglutsü. Item ajak dang nungi Ao lima yasa tebur tajungba yanglua lir ta bilemer. Longren longpang kangabo mali, lenden tajung aika aliba lima, mepong tajung den ayong tulu tila aika keta aliba lima. Aoli tesem balala nungi alima lenir aser Tsüngrem tenzükert tajung aika moatsüogo kaket shisatsü aser Tsüngremi wadang nunga alima temoatsü süa lenir aika atokdaktsüogo. Asen kini item ajak ya züngdanga alitsüla. Alima Tsüngremi kar nem shisatsü moatsü, kar nem rongsen moatsü aser kari nüba agi tenlatsü, item ajakji meyoekteper alima yanglua nübör tenzüktsüla. Saka asen Ao kin rongnungbo kati ka arishia tenük meremba ya endoktsü mapang tongogo.

Yisu-i Pilat tsüngdang nokdaker yamai ashi "Ni ochi indang kuli agütsütsü aso aser ochi atema ni alimai aru" idangji Pilati Yisu dang asungdang "ochiji kechi" ? Yohan 37:38 Ochiji anogoshia jembiba o ta Pilati metet. Anungji ochi jembiba aser kuli asüba atemabo tasüba temerenshi agütsütsü langa mali ta Pilati bilem saka Pilati ochiji paidok kechiaser pa dak ochi nüji mali liasü. Kechiaser Yohan 8:32 Aser nenoki ochiji metettsü aser ochi jagi nenok nüji kumdaktsütsü. Tamanger aika ochi agi taküm alir Tsüngrem tenüng sangdi. Saka tamanger sürnung ochi mashi agi alima asünger. Tanü tiya junga liaka asen jala jabaso ochi mashi teraksa lima nung lishia atara ayatai asütsü. Kechiyong Tsüngrem terasaba iba putu madak alitsü aser pelaseta linüka melitettsü.

Tanü ochi aser tiyazü bendanga metetba kuli Machine yangluteta maka saka alima yimya aser libaliro ajanga yamai asadangtsü akok.

Kati ka dak temulung lemtetba sama-a ogo. Ochi mashi rongsen akar tang tushiba putu kümogo. Shingaia pei akaba rongsen agi tenük masünger. Tsüngrem o süoki-ia anga-a benshir meli-i akümer, mapabo meranga meinyaker saka rongsenbo temai ja-a atuba putu. Nüktapangta lima akümer, mapa ajunga pei agitsü dena yangluba angutsü. Ochi mashiri ochishir ta jembia angutsü, Govt. project ajak süpedter (half done) aremdaka angutsü. Tema nungbo ajak yi majemer saka telungnungbo ajak yi lar asütsü. Rakpoka ochi indang ajungshir meli-i kümogo. Tsüngrem tenüng atemer rongsen angutsü mechi tiyazü shiner aika atoktsü. Alimaji Tsüngrem meimba lima masü saka sen meimba lima kumadoker, ochishir aser sensakertem tukolok malonger ta jembia angashitsü, ochi mashiba lima nung yimsüsürtem kodanga pela-a malitsü. Alima asoshi temoatsü aketba nisung aika ajungbena asütsü kechiyong Tsüngrem terasaba nübortem madak alitsü, shingaia shinga daka ochi mashi majitettsü ajak shidak angutsü; shisatsü masü saka shiba sen teimba agütsütsü ta bilema yimten aser Arogoia lokti palalai tongti o jembir jaoktsü. Tiyazü jembirtem pukümer aika alitsü saka ochi pukümerbo malitsü.

Temulungjang tamajung yur Tsüngrem den telungjem akar amai sayutsü saka aji Tsüngrembo mepelatsü. Nisungi maginütsü aika inyaker takar akümba putu asütsü, aser yimten aser Arogo madak tashi amshitsü. Memeteti tanemi temeim mekongka akümba lima akümtsü. Aibelenertemi ni aibelenago ta shingaia mashitsü aser menangzüksü. Ochi mashiba sen kibur memetet sü Arogo dangi tenla aika arutsü saka Tsüngremi mepelatsü. Pei atema shisa taka saka danger atemabo shisa maka ta liteptsü. Tsüngremi moatsüba agi ni alir ta ashir ajema akümtsü. Sen lira kibong pela-a alitsü saka sen melira kibong aika rarateba angutsü, kechiyong seni kibong madak yimsü asüba agi ochi mashiba lima nungji meranga inyakerji tekolok malonger ta menütsütsü. Pei taküm tashi mait ajakji putu majungba agi ta ashitsü ano tai karbo mojing daka tongloktsütsü. Tsüngrem lartem nübör tanüla jenjang ngur aiben tezü danga alitsü. Putu majung repranga ken mejema ateneritem aika tezü danga bilemba ajurutsü, kechiyong parnoki imlaba ama tamanger malitsü. Tsüngremi asenok nungi langka angutsü kecha meimlar saka Pai ajungbatem bilemteta tenüngsang agütsüdaktsünür. Arogotem Jubilee adongdang kecha masü ta sür sentep ka akia Arogoburtem chiyonger senshiba ajurutsü. Tasüba, alima wara palala kanga tsübua liteptsü saka Tsüngrembo aküm metsübupei linütsü aliba lima asütsü.

Ochi mashiba ya Corona wara dang nungi tamajungba lir. Corona yabo ali shi taküm ya dang samatsür, saka tiyazü yagibo ali shi aser tanüla anaprongla tepseter. Aki tsüraburtem kibong aser loktiliba ajak nung ochi o ya Laishiba amai amshia aru. Aji agi auür mali, nüktapangta pulua maliasü. Kari danga aibelenra putu aika asoshi tarak aketba nisung ta züngshia aru iba jagi alima kanga dang asüngteta lia aru. Tanü asen aliba ya asüng lanur asoshi jenjang yanglur telok lir. Ochi long kibong shia nung azünga toktsüra tarutsü lanur asensortem wapong watsü tajung jendi asen kin nungi atoka asen nübör yaritsü ta asen nukla südi.

Tsüngremi meimchir ya Pa mesükba nung yanglu. Anungji nisung shiai ni ya Tsüngrem mesük ta angatetra aji agi ajak peritsü aser angajemtsü ta amanger. Alima teraksa angudang temulung kanga shiranga bilemba agi iba o ya sarasadema lemsateper. Asenokbo pei mapang atong nung ka ken ka ken ta alima ya toktsütsü. Saka tarutsü lanu putu nem atakatem senmang masü, saka temoatsü senmang yutsünür. Ni kechi zülur iba nung ozü kibongbo maten ta masü saka ozü kibongbo yangi dena lir, iba o yagi shinga temulung teyiruma, saka Tsüngrem tsüngdang tashi mait kar lira tatok meshia kibong aser alima raksa-a aliba yanglushidini ta ayongzüker. Tsüngremi iba o azünger ajak mojangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger i angateta agitsü mepishir

Tenla ki yangluba atema Arunachal Pradesh nung pastor ka apu

October 08, 2020: Arunachal Pradesh kübok Tawang district nung Tawang Revival Arogo nung pastor, Joseph Singhi-i ozüng alema Tenla ki ka yanglu, ta tai tonglokja police-i apu saka bail nung chiokogo, ta India (International Christian Concern) osang ajanga metetdaksü.

Pastor Singhi ya October 6, 2020 nü apu, saka ghonda ishika dang lir bail nung chiok.

Tawang Additional Deputy Commissioner, Lobsang Tsering-i, district Land Revenue & Survey officer-i FIR ka agütsüba nung ajemdaker pastor apu, ta metetdaksü.

Indigenous Faith and Cultural Society of Arunachal Pradesh aser Monpa (dominant Buddhist community) Mimang Tsogpa telok nati pastor anema temepishiba ken o ka agütsüba nung ajemdaker ketdangseri FIR benoka liasü.

Tawang nung yanglu tenzük," ta paisa metetdaksü. APCRCC Tir, Tai Ete-i, "2015 küm onoki iba Tenla ki yangluba mapang nungi onoki timtem ajangshia arudar. Onok indang Tenla ki tejenbaji kanga mejungi kümer liasü. Onoki ali lemezükjang ta mepishibaji tang tashi magizük. Onok nem tamangba yimsü tsütsü temeden magütsür aser reshikangshir ta onoki bilemer," ta metetdaksü.

Tesüiba küm 21 tashi Arunchal Pradesh Christian Revival Church Council (APCRCC)-i Tenla ki yanglutsü atema ali lemezükjang ta asüngdangogo saka melemzüksü.

Osangbener den jembidang APCRCC tatong Tir, Sonara Degio-i, "1999 küm nungi onoki iba kimong nung Tenla ki yanglu aser 2003 küm nungi ali lemezüksütsü atema maparen inyaka arudar," ta metetdaksü.

"Taküm August ita nung onoki Chief Minister Pema Khandu aser Chief Secretary [Naresh Kumar] na ajurua jembidang onok nem kimong agütsütsü ta nangzük. Iba sülen onoki tejashi nung Tenla ki

India tesem ajaklen tekülem ki yanglutsü atema sorkar dang nungi temelaba meshitsü nungdaker, ajisüaka aiben Khristanem nemo Tenla ki yanglutsü atema temelaba magütsüba dang masü saka nija kidang lokti tekülem sentong agiba-a nokdang.

India tesem ajaklen tekülem ki yanglutsü atema sorkar dang nungi temelaba meshitsü nungdaker, ajisüaka aiben Khristanem nemo Tenla ki yanglutsü atema temelaba magütsüba dang masü saka nija kidang lokti tekülem sentong agiba-a nokdang.

Khristanem anema Hindu yimsü alia amangertemi, nija kidang lokti tekülem sentong agibaji ozüng alema lir ta shia nokdang.

ANOGO ABEN TSÜNGREM DEN

Nükmerem tashi

*Tenükmeremji lep ama taochi maka.
Solomon ken 8:6.*

Nisunger jakla yimya nung tenükmeremji ajak dang tamajungtiba lir. Nükmerem dak keta aliba yimyaji kodang repringdir, laji teti tangar akaba, renlokba aser ajungba ngua jashia ain adoker, la akaba nung kodanga tenük masünger saka pi ajungba dak dang mokoachia bilemba agi sünger alir. Tangar anisüngzüka amoa aodang la amoa moi tasa balala indang shisadanga mapang timbaka süidaksür; laji temeim nung nüpkok asünung pi indang junger ta meshiteter.

Israel chuba Ahab dak sempet tamajung kaji tenükmeremba ya liasü. I.Chubatam 21:17-26 nung pai Nebother tsükmenatsü lu rakzükba angur.

Tenükmerem ya temenen rongnung tetsütiba ta ashitsü koka lir; kechiaser la dak taochi sayua benshiba shisatsü teraa maket nung leper den atishia jembiba angur, ano aji dang masü tenükmerem yagisa teret tap kümdaksüba indang A.Shin 14:30b nung shia lir.

Khrista nung amangbapurtem, asen dak tenükmerem shisatsü ali tashi aseni tangar aser Tsüngrem kodanga peladaksütsü makok, anungji iba yimya benshiba nungi teti pilaa aliba taküm ka asütsü merangdi.

Sarasadem

Tenükmeremba yimya nungi anogoshi pilaa litetba taküm ka asütsü Kibuba nai ni yariangma. Amen.

Jharkhand state nung Khristan 7 dak azük aser kou ongdoktsü

New Delhi, October 08 (Agencies): India kübok Jharkhand state nung Hindu yimsü alia amangertemi Khristan tenet dak azük aser parnok rongnungi Pastor Raj Singh densema nisung pezü kou ongdokja maaksütsüogo, ta osang ka ajanga metetdaksü.

Pastor Singh-i ashiba agi, "Kü kou ongdoktsüba mapang nung blade agi teküp nung arangba agi kü kolak nungi azü ayim. Anasa alir kati kou ongdoktsüsang dang azü ayimer, anungji kanga kümdanga kou ongdokjang ta ashi, saka pai 'Ni blade ya tekong nung masü saka tekolak nung ang amshir, anungji item Khristanem yagi pelatsüla' ta ashi."

Khristanem kou ongdoktsüba sülen lokti jagi tsüngsem agi azük yanglur parnok nem azüksüba sülen Simdega district kübok Bherikudar yimdak tesem balala sema maaksüja senzü. Hindu nungertemi onok dang "Jai Shri Ram" ta shiang ta tuyu, saka Khristanemi ibaji mashiba agi süng agi azük," ta paisa ashi.

"Azük maremba agi karibo ibaji (Jai Shri Ram) ashi. Shirnoki ibaji meshilir idangyongjisa süng agi azük," ta pai metetdaksü.

September 16, 2020 anepdang arrshi küm 37 pastor, Singh par kima mena lia Hindu nungertem arua pa dang, nai yimdaklirtem Khristan yimsü dangi meyipdaksü asü?, ta asüngdanga liasü. Parnok rongnung kari pastor-i tribal



yimsü amanger nisung trok Khristan yimsü dangi meyipdaksüogo, ta ashi.

Pastor Singh ya Hindu nungter liasü saka Khristan yimsü dangi meyipba agi pai Hindu yimsü ashioksüogo, ta parnoki aitsü. Na Khristan akümba agi nai Hindu yimsü tenüng menüktsüogo, ta parnoki shia pa atala. Iba sülen parnoki Hindu yimiyim ayima pastor dak azük.

Iba mapang nungji pa kinüngtsü adianu, Deepak Kullu kidangi shilang aser lokti jagi pa dak-a azükba sülen tanga Khristanem kidangi-a tua teburtem atsüzüker azük.

Pastor kinüngtsüi parnok dang, shiba tetuyuba nung Khristanem dak azüker ta asüngdangba langzua lokti

nungjagi kari, district ana nung BJP lenirtem tetuyuba nung Khristanem dak azüker, ta metetdaksü. Pastor densema yimdak Khristan tenet dak azük.

Bherikudar yimdak Khristan kibong 24 lir aser iba nungjagi Khristan kibong 23 lir.

"Parnoki onok Kumhar-i anir aoba sülen kanga aritepa kou mashi-mashie ongdoktsü, aser ibaji onok maaksütsütsü tebilemba nung inyak," ta pastor-i ashi.

Khristanemji kou ongdoktsüba sülen Kumhar, Mahato, Lohra, Girija, Sarna aser Bahari areas sema anir senzü, iba sülen parnoki police dang, ozüng alema nashi shi belener Khristanem kar parnoki pua lir, ta metetdakja

liasü, ta pastor-i ashi. Iba sülen police arua Khristanemji police station-i anir ao aser Khristanem ki mita ao saka parnok kidang nashi shi mangu, ta pastor-i ashi.

Eternal Light Foundation Ministry Arogo nung Pastor Rajesh Bage-i, Khristanemi nashi tepset, shi achi aser ozüng alema shi belener ta tai tongloksüyonga Khristan kitem nung iba kuliji mangu, ta ashi.

Iba sülen ang police-i Khristanem dak azüker asem pua Simdega police station-i anir ao.

Khristanemji aonung 7:00 ako nung ang chiok, saka iba mapang nungji Pastor Singh kinüngtsüi aibelenertem anema FIR ka agütsür liasü; FIR

nungji nisung 9 tenüng agüja lir aser mejangjaba nisung 10 lir ta shia lir.

Khristanem kasa aonungjisa chiok saka aibelenertem rongnung nisung asem mechok. Aibelener rongnung nisung kabo September 22 nü pasasa police matsüngdangi aru aser ka September 28 nü Ranchi nung lia puogo.

Hindu nungter jagi Khristan pongu tepsettsü ta amokmerenba osang ka September 29 nü angashiba sülen nungi aonung shia Khristan pongui melentepa yim süngküm anüker.

Pastor Singh ya Hindu nungter temaba kin kibong ka nung aso saka 2016 küm pai Khristan yimsü agizüka liasü, anungji pai taküm kuli agütsüba ajanga nisung melungjang nung kanga kongshir, ta Pastor Bage-i ashi.

Khristanem anema inyakertemji Bajrang Dal telok nungi züngsemtem asütsüa akok ta melung malemer, saka osangbenertem den jembidang Bajrang Dal telok nung tongti lenir katibo, Khristanem amakertemji Hindu nationalist telok tasen ka- Jai Bhawani Sangathan nungi züngsemtem lir, ta ashi.

Jharkhand kübok tribal state tem nung Khristan yimsü ya küm 200 tejaklen proka liasü aser tribal yimtsüngtem nung Khristanem anema Rashtriya Swayamsevak Sangh (RSS) aser parnok den sendaka aliba teloktemi inyaker.

OLONG PAITEP # 5604

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN		LANGTSÜNGLEN	
2. Auo nung chiyongtsü asenba - (7)		1. Lenmang - (7)	
5. Mangyimba mapang - (5)		2. Aor kidong ka tenüing - (6)	
7. O tamendakdak - (4)		3. Tenarong maten - (6)	
8. Pei dak malangba - (7)		4. A _ _ _ g - (3)	
10. Juli - (7)		6. Mopung apodoka - (3)	
12. Sen ayudak - (7)		ola adokdaksüba - (3)	
14. Tenük agi ajitet - (4)		9. Tongtipang tagitsü - (7)	
15. Tamajung aküm - (5)		10. Menungra bilem - (6)	
16. Apuso - (7)		11. Aiür - (6)	
		13. S _ _ _ k - (3)	
		14. T _ _ _ r - (3)	

OLONG PAITEP # 5603 TELANGZÜBA

TIPIEN :	LANGTSÜNGLEN :
1. Yiar, 3. Tesola, 7. Yimra,	1. Yimti, 2. Amen, 4. Shiner, 5. Alaka,
8. Tangar, 9. Peria, 10. Tanur,	6. Satan, 9. Putet, 10. Tembar,
11. Tasen, 13. Lemjem, 15. Tambu,	11. Tatok, 12. Amang, 14. Jala.
16. Khuret, 17. Sang.	

ALOKBAR KIBONG NUNG :

Warakla : Tambu, asen kidangsür tasenbar kibong yabo jangratemtsü ka atii, anogoshia kinungbu mapai aodang kinungtsü dakji kiss sürang aoer ato. Naia yamaji inyaknungbo haya jungla.

Alokba : Ajito ni laji ano junga memetet nung koda kiss asütsüba?

Warakla : Oh Alokba!!

Lilir : WhatsApp

TANÜBO NAI LANGZÜANG

Q. Koba State-i Swachh Sundar Samudayik Shouchalaya category award angu?

A. Punjab B. Gujarat
C. Andhra Pradesh D. Uttar Pradesh


(Taruba adok nung onoki langzüsü)

YASHI ADOK TELANGZÜBA : Bangladesh

Tepela Tasoba Anogo

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :



NAI-A YA METETTER MA?



Guwahati, October 7: Arishi küm 18 tain Tanveer Firdous Hussain-i teka anaprongla alener cycle nung km 34.92 minute 115 nung oteta otsü tasen ka yangluogo. Pai Assam Book of Records (ABS) nung otsü tasen ka yanglua liasü. Hussain ya SR Academy, Goalpara nung kaketshir ka lir aser pai iba otsü tasen ya October 1 nü yanglua liasü. Pa Alsaram Hospital, Goalpara nungi anepdang 5:00 ako nung apuso aser Solace Hospital, Goalpara 6:55 ako nung atong.

SUDOKU # 5645					TELANGZUBA # 5644												
			8	7				1	9	3	7	4	6	5	2	8	
	1		4			9	7	3	7	4	6	2	8	5	3	9	1
				3		5	8		5	2	8	3	9	1	6	7	4
		2							3	1	9	6	2	8	7	4	5
			5		6	1	4		8	6	7	5	3	4	2	1	9
6	4	7		1	8	3			4	5	2	1	7	9	8	3	6
	6	8	1	5		2		7	9	3	5	8	1	7	4	6	2
		9		3		8			6	7	4	9	5	2	1	8	3
			7			4		6	2	8	1	4	6	3	9	5	7

OJANG LUTEP # 5192

KÜTAMBO :

HOSCOL :

NURTATEM :

HIKEC :

MAKKOA :

ÜMK :

SPANGTEMTÜ :

HINGSAIA :

TETMEA :

KAMA :

OJANG LUTEP TELANGZÜBA # 5190

MEIMLABA MAPANG ASEN TAKÜM NUNG TAJUNG ASER TAMAJUNG AJAK AJURUTSÜ

TAN HOPTA ATEMA - KOMA SÜLA ?

Q. Asenok tenla ki ya tereprangtsü nung ariju mesüka yanglu nunga koma süla ?

Olong 20 shi nung October 09, 2020 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsüsü.

Taoba mapang CBI Director Ashwani Kumar tasü mang rongdokogo



Shimla (Himachal Pradesh), October 08, 2020: Brihostibarnü Shimla nung tasü mang rongdokba tesem nung CLP lenir, Mukesh Agnihotri-i taoba mapang CBI director aser taoba mapang Nagaland Angh, Ashwani Kumar nem akhüm agütsüba noksa nung angur.

Shimla, October 08

(Agencies): Taoba mapang CBI Director, Ashwani Kumar, Bodhbar aonung Shimla nung par kidang soeta sür lia anguba sülen Brihostibarnü tasü mang rongdokogo; par jabaso Abhishek-i mi senokja liasü.

Mang rongdokba tesem nungji Himachal Pradesh power minister, Sukhram Chaudhary, Congress Legislative Party lenir, Mukesh Agnihotri aser taoba mapang state Congress Tir, Sukhvinder Sukhi nung den

asür kinüngertem liasü.

Arrshi küm 69, Kumar CBI director inyakba mapang nung pa leniba kübok 2008 küm Noida nung Aarushi tepsetba ken o densema tongtibang ken o aika bushisüngdanga liasü. Bodhbar aonung Chhota Shimla anasa Brockhurst nung par kidang pai pasasa alenseta asü, ta bilemer.

Mezüng bushisüngdanga ajanga, tesüiba ita trok nung Kumar libaliro yimya kanga melenshiba jangjaogo, aser pa

kidang dang kanga azüngmeyaka aliba agi pai soeta asü asütsüa akok ta bilemer, ajisüaka police-i tanga lenla nungia pa asüba kuli bushisüngdangdar.

1973-batch IPS officer, Kumar ya 2008 küm Central Bureau of Investigation Director aküm. Ato kilonser anükba Special Protection Group nunga pa inyakogo aser UPA sorkar mapang nung 2013 küm pa Nagaland Angh shima liasü.

India nung Covid agi asür 1,05,526 jungogo

New Delhi, October 08

(Agencies): Tesüiba ghonda 24 tsüngda India nung ano nisung 78,524 dak coronavirus tashidak putet aser iba tashidak agi nisung 971 asü; Brihostibarnep tashi nung India nung coronavirus case lakh 68 jungogo, ta Brihostibarnep Ministry of Health and Family Welfare (MoHFW)-i metetdaksü.

Tang tashi nung linük nung nisung ajak agi 68,35,656 dak coronavirus tashidak putetogo, iba nungjagi tang tashirangdakpur 9,02,425 lir aser nisung lakh 58,27,705 dak tema anepogo.

MoHFW-i ashiba agi, tesüiba anogo ka tsüngda linük nung coronavirus tashidak agi nisung 971 asüba densemabo iba tashidak agi asür ajak agi 1,05,526 jungogo.

Iba wara agi tamajungba kongshiba state ji Maharashtra lir, aser iba state nung tang tashirangdakpur 2,44,976 lir, nisung 11,96,441 anepogo aser 39,072 süogo.

Tanabuba state jji Karnataka lir; state nung tang tashirangdakpur 1,16,172 lir, nisung 5,42,906 anepogo aser tang tashi nung nisung 9,574 süogo.

Kerala nunga tang tashirangdakpur 92,246 lir,

nisung 1,60,253 anepogo aser nisung 906 süogo. Andhra Pradesh nunga tashirangdakpur 49,513 lir, nisung 6,78,828 anepogo aser nisung meyirjang trok dak tema süogo.

Linük yimtiba, Delhi nung coronavirus tashidak agi shiranger 2,70,305 anepogo, nisung 5,616 süogo aser tang tashirangdakpur 22,186 lir.

Brihostibarnü Indian Council of Medical Research (ICMR)-i ashiba agi, October 7, 2020 tashi nung linük nung samples ajak agi 8,34,65,975 tendangogo aser iba nungji Bodhbar nung samples 11,94,321 tendangba densema lir.

Election agitsü aliba tesemtem nung nisung 100 adenshitsü melar

New Delhi, October 08

(Agencies): October 15, 2015 anogo matong tashi assembly/MP election agitsü aliba constituencies nung nisung 100 adenshitsü atema Ministry of Home Affairs (MHA)-i temelaba agütsüogo; ajisüaka Containment Zones nungbo memelar.

MHA-i, hall/takdang capacity apir shilem 50 nung ang nisung adenshitsü melatsü aser timtiba agia nisung 200 dang adenshitsüla, ta metetdaksü.

MHA-isa, nisung ajaki mask agitsüla, nisung o nisung na tsüngda pilaa alitsüla, thermal scanning ayutsüla, teka metsüksüla mesüra sanitizer amshitsüla, ta metetdaksü.

October 8, 2020 nü Ministry of Home Affairs (MHA)-i, state sorkartemi assembly/parliamentary election agitsü aliba constituencies nung October 15 tashi nung yimtenren dak sendakba senden alitsü melatsüla, saka ibaji Containment Zones nung masütsüla aser nisung 100 tashi adenshitsü melatsüla, saka telatetbatem shidak benshitsüla, ta metetdaksü.

MHA-isa, yimtenren dak sendakba senden atema state/UT sorkartemi SOPs tejangia metetdaksütsü aser itemji

shidak benoka benshitsü, ta metetdaksü.

Bihar nung assembly elections shilem asem küma lemsar October 28, November 3 aser November 7, 2020 anogotem nung agitsü aser November 10 nü votes azüngba den election osang sangdongtsü

Iba dak alia state balala nung assembly menden tazüng aliba constituencies nung November 3 aser November 7 na nung by elections agitsü. November 7 nü Bihar nung Valmiki Nagar Lok Sabha menden atema-a by election agitsü.

Tawa Election Commission-i Lok Sabha menden ka aser assembly constituencies 64 nung by election agitsü atema sangdonga liasü. November 3 nü assembly menden 54 atema by election agitsü aser November 7 nü Bihar nung Lok Sabha menden ka aser Manipur nung assembly menden ana atema by election agitsü sangdonga liasü.

Bihar state dak alia elections agitsü aliba tanga state temji Chhattisgarh, Gujarat, Jharkhand, Haryana, Karnataka, Madhya Pradesh, Manipur, Nagaland, Odisha, Telangana aser Uttar Pradesh state tem lir.

88buba IAF Foundation Day among; PM Modi-i salem lemsatep



New Delhi, October 08, 2020: Brihostibarnü New Delhi nungi kilometer 80 pilar aliba Hindon Air Base nung 88buba Indian Air Force (IAF) anogomong sentong nung IAF nungi Akash Ganga Sky diving team-i shilem agiba noksa nung angur.

New Delhi, Mongputeni/

October 08 (Agencies):

Brihostibarnü 88buba Indian Air Force (IAF) Foundation Day anogomong nung Ato kilonser, Narendra Modi aser linük Tir, Ram Nath Kovind nati salem osang lemsatepba den külemi tenüngsang agütsü.

Ato kilonser Modi-i, linük kümzüksü atema IAF sepaitemi tasü itta linük kanga nendaka tenzüka ajanga nisung ajak ajungmesor, ta metetdaksü.

IAF sepaitem nem tenüngsang agüja Ato kilonseri twitter ajanga, IAF sepaitemi India nung anüng kümzüka ayuba dang masü saka lendong mapang nung meimchir

tenzüka maparen nung tongti shilem agir, ta metetdaksü.

Tir, Ram Nath Kovind-ia, IAF sepaitem dang linük sentsüh lir aser linük tenzüka atema IAF sepaitem dang pelar, ta ashi.

Kovind-i twitter ajanga, "Air Force anogomong nung onoki IAF sepaitem, anisüngzüker alirtem aser sepaib kibongtem dang pelar. IAF-i asen anüng kümzüka ayuba dang masü lendong balala mapang ketdangsertem yarisemba atema linük sentsüh lir," ta metetdaksü.

Paisa, Rafale, Apache aser Chinook tayimtsütem ajanga Indian Air Force nung temelenshi tulu alitsü, ta shisem.



Mumbai, October 08, 2020: Brihostibarnü Mumbai nung BJP state executive senden nung Maharashtra BJP Tir, Chandrakant Patil-i jembiba noksa nung angur. Kasa noksa nung Maharashtra Legislative Assembly nung opposition lenir, Devendra Fadnavis, Maharashtra Legislative Council nung opposition lenir, Pravin Darekar aser tangartem angur.



Quintana Roo, Mongputeni/Oct. 8, 2020 : Bodhbarnü Cancun, Quintana Roo state, Mexico nung Hurricane Delta agi kongshiba sülen sepaitemi süngdong laoa alibatem mürektetba noksa nung angur. Hurricane Delta-i Bodhbarnü Mexico indang Quintana Roo state tinga ariba mapang cyclone ya category 4 nungi category 2 akum, saka tzünglu kanga sashia aruba aser mopung aonba ajanga ki-o-jen kar raksatsü, ta National Meteorological Service (SMN) ajanga ashi.

Brazil nung COVID-19 agi nisung million 5 menepogo

Brasilia, Mongputeni/October 08 (Agencies): Brazil, koba alima nung coronavirus agi tesashitiba kongshiba linük tanabuba jenjang nung ali, yangji Bodhbarnü tashinung nisung million pongu dak tema iba virus yagi menepogo, aser mezüng tenzükba mazüokdang tanaben tenzükshitsü akok, ta mongintem tsüba bilemer.

Brazil indang health ministry ajanga Bodhbarnü ashiba agi, tesüiba ghonda 24 tsüngda linük nung nisung 31,553 dak iba tashidak jangjateta tang tashinung COVID-19 yagi nisung 5,000,694 menepogo aser United States aser India na sülen lir.

Johns Hopkins University nungi tang tesüsa data sayaba nung iba tashidak agi asür nisung 148,228 lir, koba United States sülen alitsü, aser health tsütsü mongintemibo iba tashidak agi asür ya kanga agi timba alitsü, ta ashir.

Tang tesüsa anogoshi nisung

asüba asadangba nung anogo ka nung nisung 658 asür amai asadanteter, kong July ita anogo ka nung nisung 1,073 tashi anogo ka nung asü. Iba tashidak tasen jangjateta tsütsüa ajema kümogo, kong July ita putetba dang nungi tang anogo ka nung nisung 26,140 shi dak puteter.

Anogoshi iba tashidak putetba ajema kümaka public health tsütsü mongintem Brazil nung aliba nüburtem dang social distancing yimya mamshiba ajanga iba tashidak tanaben poktetsütsü, ta tekümdangtsü ashir.

Federal University of Rio de Janeiro nungi epidemiologist Roberto Medronho-ibo COVID-19 ya tali tendangra tali putetsü, ta shiogo.

"Iba tashidak tanen makai putetaka ketdangsertem social distancing tazüokbatem salaba asenoki angur," ta pai osangbener dang ashi.

Iba tashidak putetba nung tejemba kümduksütsü makoker," ta University of

Brasilia nungi epidemiologist Mauro Sanchez-i ashi.

"Anungji tetenzüklen iba tashidak ajema putetba liaka ano tejangja kuli monguteter," ta pai osangbener dang ashi.

Brazil Tir Jair Bolsonaro daka iba virus jangjatetaa pai iba virus süoki ia magizük.

Bolsonaro-i iba virus ya yimra ka dang ta ashir, aser paibo lockdown anema nokdak aser Brazil nung dang akhi ama alitsü ajungshi.

"Iba virus ya yimra tilaka ama pa taneptsü ngutet. Ibayongji nüburtem mangmanger, kechiaser iba tashidak yagi Brazil nung nisung 150,000 dak tema süogo," ta osangbener kati ashi.

Asükwa süitema tsükla aruba mapang Brazil nungertem tzüküm nung lokti tulu adenshir aser parnoki iba tashidak nungi kumzükä alitsü mera kecha magir.

Brazil nung alirtemi social distancing yimya khenyongi mamshir, ta osangbeneri ashi.

America nungersangro mejemer Louise Gluck-i Nobel Prize in Literature akok

Stckholm, Mongputeni/October 08 (Agencies): America nungersangro mejemer Louise Gluck-i tarak maket sangro mejemer ola amshia züluba atema 2020 Nobel Prize in Literature konang ngutet, ta Swedish Academy ajanga Brehostibarnü ashi.

Academy Permanent Secretary Mats Malm-i ashiba agi, North America nung anepdang iba osang angashidak Gluck aoksa aser pela liasü.

Yale University nung professor inyaker arishi küm 77

Medicine, physics aser chemistry nung takok angur nem oba senpet ya hopta tetenzüklen agüja lir aser peace atema iba senpet ya Hokulbarnü sangdongtsü.

Taoba mapang literature prize agütsüba nung aiben mangatetep adoka liasü.

2018 küm iba sempet agütsür ka kinungbu densema tim masüba mapa inyakba mechi thinen aser 2019 küm takok angur ana men Academy ajanga iba senpet ya agütsü.

Mapang tatsüka lir iba sempet agütsüba nung ochishia

Louise Gluck



tain Gluck-i mezüng sangro, "Firstborn" ya 1968 küm zülü aser tanü asüng tensa nung America nungersangro kaket ken o zülur tejangja ka akum.

Lai züluba sangro ya kanga tejangja agi zülur, aser lanuwa, kibong takum aser tsürabur aser adianutem tsüngda tesendaktep nung temolung agüja zülur.

"Lai züluba sangro tem nung mangdang kanga junga amshia zülur aser lasasa rajema zülutsü timtemba ama shingaia timtem majurutsü," ta Academy ajanga ashi.

Nobel prize tem ya dynamite nguteter aser taka-tait shishilembar Alfred Nobel nungtem nung agütsür aser scielce, literature, peace amala nung takok angur nem 1901 küm nungi agüja arur.

inyaktsü atema temelenshi sangdonga liasü.

Saka literature nung Nobel prize ngua alir Austria nungersangro kaket zülur Peter Handke-i taoba küm sangdong ka nung, 1990s mapang Balkan rara nung Serbia nungersangro akoksaba indang züluba aser nationalist Slobodan Milosevic asü pila sentong nung adenba mechi alimai aitsü.

Milosevic ya UN war crimes tribunal nung kin samatsütsü meranga mapa tamajung inyakba ken o nung obendang ata tepuokdak alidak 2006 küm asü.

2016 küm America nungersangro kentener aser ken mejemer Bob Dylan nem literature prize agütsüba mechi nüburtem tsüngda molung machi adoka liasü.

Afghanistan nung aliba US sepaitem Christmas mapang kidang alitsüla: Trump

Washington, Mongputeni/October 08 (Agencies): Taruba küm tetenzüklen tashinung Afghanistan nung US sepaitem 2,500 dang yutsütsü, ta national security adviser-i shir ghonda ishika dang lir, Afghanistan nung aliba US sepaitem ajak Christmas mapang kidang alitsüla, ta Tir Donald Trump-i ashi.

February ita United States aser Taliban tsüngta alimai meteta tezüngzüktep ka agiba nung bendanger sepaitem Afghanistan nungi 2021 küm May ita tashinung ainshimatsüla aser iba melen Afghan nung aliba telungpur teloki security guarantee agütsütsüla, ta shia lir.

Iba tezüngzüktep mechi Afghan sorkar aser Taliban

tsüngta teti asoshi yimjung ken o Qatar yimtiba, Doha nung taoba ita nungi jembiba tenzükä lir. Telok ana tsüngta par linük nung azüdokshi ajemtsü aser tashi lemsatempa yimsü asütsü atema jembir.

Afghanistan nung November ita tashinung US-i par sepaitem 4,000 aser 5,000 tsüngta ajemdaksütsü ta Trump aser danga ketdangsertem shia lir. Iba sülen Afghanistan tensa nung ajemdaker sepaitem ajemdaksütsü, ta ashir.

Trump-i Twitter nung, "Afghanistan nung tasü tait asen sepaitem anünga aliba ishika ya Christmas tashinung kidang alitsüla!" ta zülutsü.

Ajisüaika Trump-i totuyuba agütsür asü masüar mejangja.

Trump, shiba taruba ita tir atema tanaben tokteptsü ali, pai küm ter dak tema raraba linük nungi sepaitem aika anizüker aruogo, saka Iraq, Syria aser Afghanistan nung ano sepaitem meyrirjang aika lir.

Trump-i iba osang ya tweet mesüdag NSA Robert O'Brien-i ashiba agi, tang Afghanistan nung US sepaitem 5,000 dang tajemba lir aser taruba küm tetenzüklen 2,500 dang akumtsü.

"Tatamsa Afghan nungeri par sasa yimjung atema mera agütsüla... Iba maparen ilonga masütsü, yangji timtem jenti alitsü, saka ibaji tongtipang mera ta asenoki bilemer - America nungertem kidangi shilangtsü nungdaker," ta O'Brien-i University of

Nevada, Las Vegas nung sentong ka nung ashi.

National Security Council aser White House nungibo tang tashi telangzüba kecha agüja mali.

White House ajanga Afghanistan nungi par sepaitem anizüker aruba yagi Trump jenjang tajungba akumtsü, shiba November 3 nü election nung kümsük tanabuba atema tokteptsü.

Trump-i iba o ashiba ajanga Afghan sorkar Taliban den yimjung ken o jembiba mapang tamendak dak jenjang tera mejungi akumtsü akok.

Qatar yimtiba nung Afghan sorkar aser Taliban tsüngta yimten ken o jembiba mapang Afghan sepaitem aser Taliban züngsem aika rara nung süogo.

Tawa civilian tema aika taküm samaogo.

House of Representatives committee matsüngdang taoba ita kuli agütsüba mapang, US sepaitem 4,500 ajungba mapang administration ajanga tesendaktep aser mapa inyaker aliba asadantsü aser telemtetba agütsü, ta Special Envoy Zalmay Khalilzad-i ashi.

Afghan nung raraba mapang US sepaitem 2,400 shi taküm samaogo aser meyrirjang aika yirügo.

Osama bin Laden densema al-Qaeda lenirtem jenokdaksür ta iba mapang yimsü süa aliba Taliban telok tenüng asenba sülen US-i Afghanistan maker Bodhbarnü küm 19 jungogo. 9/11 lendong ya al-Qaeda mapa, ta tai tonglokja liasü.

Centaur Hotel nung Aamir Khan-i film tangoktsü



New Delhi, Mongputeni/October 08, 2020 (Agencies): Actor Aamir Khan-i pa indang taruba film 'Laal Singh Chaddha' indang scene kar Delhi Airport indang Centaur Hotel nung tangoktsü, ta sangdong ajanga metetdaksü.

Laal Singh Chaddha film shilem kar Centaur Hotel indang bar 'SomBar' nung tangoktsü renemogo aser Aamir-i bar indang süngküm raksaja tangoktsü, ta sangdong nung shia lir.

Laal Singh ya nungtugu Hollywood film 'Forrest Grump' otsü nung ajemdaker tanben hindi oshi nung yangluba film ka asütsü, kong Aamir den Kareena Kapoor-ia tongti shilem agiba angutsü.

October 17 nungi Amazon Great Indian Festival Sale tenzüksü

Mongputeni/October 08, 2020 (Agencies): Online sabang tetsüti Amazon ajanga parnok indang 'Amazon Great Indian Festival Sale' sentong October 17, 2020 nü nungi tenzüksü. Festive tenzüksü aliba tejakdang online shopping janratem atema Amazon-i iba osang jangjatsüogo.

Taoba Sale ama, Amazon Prime züngsemtem atema alakteta anogo ka tejakdang (October 16, 2020) shishilembatsü maongka lapoktsütsü.

Iba sale sentong atema tatem anogo agüja mali aser Amazon-i ashiba agi, tayoker aser talir tem atema iba sale ya ita piyong agiba sentong ka alitsü. Tesüiba anogo ishika tejakdang, Flipkart-ia parnok indang 'Flipkart The Big Billion Days Sale' sentong akatsü jangjatsüogo. Flipkart sale ya October 16 nungi October 21, 2020 tashi agitsü.

India kübok shishilembaba (medium aser small businesses) wadang ajungkettsütsü nukjidong nung, Amazon-i dollar billion 1 teyari agütsütsü bilemdar aser 2025 küm tashi nung business tila teri million 10 shi iba digital platform nung adentsü imlar. COVID-19 wara ajanga maparen ajunga anenja arur sülen, Amazon-i shishilembaba wadang balala nungitogo.

Amazon-i ashiba agi, Sale

Aamir aser Kareena nati film talisa 3 Idiots aser Talaash: The Answer Lies Within film nung shilem agiba ajaki jangjaa lir.

Centaur Hotel ketdangser kati ashiba agi, film tangokba mapang hotel telung nung nungdakattem renemtsü atema Aamir indang team-i achaaayangtsü. Scene balala rongnung Aamir-i bar indang gate raksaja tangokba densema lir.

Aamir indang scene dak alaka, scene balala tangoktsü atema Kareena-a hotel yagi arutsü.

Centaur hotel tem ya Hotel Corporation of India indang unit ka lir, koba Air India Limited indang 'public limited subsidiary company' alitsü.

COVID-19 tenokdangba ajanga iba hotel shibangadok,

mapang HDFC Bank credit aser debit card tem den külemi EMI atema 10% instant discount agütsütsü. Ano külen, Bajaj Finserv ajanga credit aser debit cards amshirtem sen lakh 1 tashi No Cost EMI angutsü. Kasa mapang, talirtemi Amazon Pay Daily Shopping Rewards atema maongka angutsü, kong Amazon Great Indian Festival Sale piyong anogoshia sen 500 ajanzüksü.

Amazon Great Indian Festival Sale mapang, oset tasen rongnung OnePlus 8T 5G smartphone angutsü. OnePlus 8T ya October 14, 2020 nü sayatsü. Dusehra aser Diwali benjungmung matongdang, Amazon Great Indian Festival Sale atema mapang tetemjen nung offer, scheme aser discount balala sangdongtsü. Sale mapang, Amazon Fire TV Stick Lite den Alexa Voice Remote Lite sayatsü aser tejagrartemi jelia mekaa yutettsü. Amazon Fire TV Stick Lite den Alexa Voice Remote Lite jenjang sen 2,999 asütsü.

Amazon-i ashiba agi, sale mapang No Cost EMI option den külemi smartphone, laptop aser tanga electronics o accessories atema exchange offer balala agütsütsü. Smartphone atema-a deal balala angutsü, kong OnePlus, Samsung, Xiaomi, Vivo, Oppo, Nokia, Honor aser Apple

saka film tangoktsü atema iba hotel tanaben lapoktsü. Ajisiaka, nüburtem mesüra senzüsenbongertem anenzükdaksütsü sentong mali.

Ketdangseri ashiba agi, tarutsü anogotem nung iba hotel tajungba yanglushitsü atema Air India-i asalentong yangludat. Centre Sorkari iba hotel 2032 Küm March 31 nü tashi achaaayangtsü atema melaba sülen, 2019 December ita hotel ya tanaben yanglushia liasü.

Aamir Khan Productions aser Viacom18 Motion Pictures ajanga yangluba 'Laal Singh Chaddha' film ya 2021 küm Khristmas benjungmung mapang theatre tem nung sayatsü tebilemba lir. Alima ajunga asüngba coronavirus wara ajanga film maparen ajak anentsüba sülen, iba film sayatsü küm ka atsülangtsüogo.

Secret Superstar director Advait Chandan lenisüba kübok iba film yanglutsü. Film indang shilem karbo Turkey nunga tangokogo. India nung COVID-19 tensa mejungi küma aoba asadangteta, August 2020 nung film indang scene kar Turkey nung tangoktsü atema film yanglurtem bangjemtep.

Tang, India nung COVID-19 tejangja puteter nisung lakh 68 dak tema kümogo aser iba tesashi wara ajanga nisung 1,05,554 dak tema süogo.

iPhone line-up brand tem densema lir. Laptop deal nung Xiaomi Mi Notebook 14 aser Mi Notebook 14 Horizon Edition, Microsoft Surface device aser tangatem atema offer agütsütsü akok.

* Amazon Great Indian Festival Sale 2020 atema offer aser deal kar:

1. Electronics & Accessories nung 60% Off angutsü aser Printers, Vlogging devices, camera devices, smartwatches & fitness trackers, gaming essentials, routers & hotspots nung deal balala angutsü.

2. Home aser Kitchen products den home decor, cooking & dining, home tools aser furniture tem 80% Off nung angutsü.

3. TVs, washing machines, refrigerators, dishwashers aser air conditioners tem 65% Off nung angutsü.

4. Nungdakba osettsüset tem (daily essentials) 20-70% Off nung angutsü.

5. Fashion Product nung 80% Off agütsütsü.

6. Echo, Fire TV aser Kindle device tem 50% Off nung angutsü.

7. Books, Toys, Gaming, fiction & non-fiction books, Academic books, remote-controlled toys, games & accessories tem 70% off nung angutsü.

JABASO MENUNGRA-A BILEMTETER



09/10/19 - 09/10/20

Asür Sünep Aier (Longpa) Diphupar 'B' Dimapur

Kodanga meshilangba limai ogo, saka Kibuba kidang ajuruteptsü. Aji kinünger ajak tamang aser sarasadem. Küm ka süia ogo, ne mapa tajung bilemteter aser mamateter.

Tsürabur aser teyi-tei kinünger

Kohima CEO-i Nodal Officer shimogo

Kohima, Mongputeni 08, 2020 (TYO): 14-Southern Angami I aser 60 Pungro Kiphire Assembly Constituency indang Bye-Election dak sabang ajanga ozüng alema

MCC tim mesüi amshiba maparen mittsü aser asadangtsü atema, Chief Electoral Officers Office, Project Manager, Iliho Nodal Officer ama shimogo, ta sangdong ka ajanga metetdaksü.

Jalukie ADC-i metetdaksür

Peren, Mongputeni/October 08, 2020 (TYO):

Truenat screening test ajanga nisung kar dak COVID-19 positive tejangja putetba den tashidak prokba azüoktsü aser Ministry of Health & Family Welfare, Directorate General of Health Services (EMR) Division, Govt. of India ajanga agütsüba tetuyuba nung anidaka, Jalukie ADC Dr. Tinojongshi Chang-i sangdong ka ajanga, October 7, 2020 nungi tenzüka osang tejangja ka magütsü tashi Jalukie Sub-Division kübok New Jalukie Village nung House No. 36 shibangtsü aser kasa anogo (07.10.2020) nungi tenzüka ghonda 48 tashi Jalukie Town kübok Kedime Colony (Ward No-5) nung House No. 80

shibangtsü atema tetuyuba agütsüogo.

Iba den bendenloksema, shibangtsüba tesem telungtet nung nüburtem merük mejuba den iba tashidak lendongbang nungi kümzüka alitsü mechi, tekümdangtsü meratem talisa tejak nembangba mask inoktsü, mapang shia teka shidoktsü/metsükdoktsü aser lokti nungi pilar alitsü atema ADC-isa metetdaksü.

Nisung kari danga item tetuyuba nung manidakra, IPC indang Section-188 kübok merenshiba dak alaka, Disaster Management Act, 2005 indang Section 51 nungi 60 tashi agüja aliba tashi amshia aibelener nem tapet temerenshi agütsütsü, ta ADC-i shisem.

Mon nung DLCC senden amen

Mon, Mongputeni/October 08, 2020 (TYO): National Tobacco Control Programme (NTCP) kübok District Level Coordination Committee (DLCC)-i Bodhbarnü, Mon Town Council Committee hall nung senden ka ayongzüik.

Iba senden nung Ilika, SDO (civil) Mon menden liasü aser E. Nyeamyang Konyak District Consultant (NTCP) Mon-i o tatsüka jembi.

Dr. I. Simon Sumi (District Nodal Officer NTCP Mon-i, tobacco achiba aser iba ya ajanga temang nung timtem balala adokba indang telok dang rasa ashi.

Mon District nung National Tobacco Control Programme atema tsünglanglen agüja aliba züngsemtem shimogo:

1) Deputy Commissioner

Mon, Chairperson.

2) District Nodal Officer (NTCP) Mon, Member secretary.

3) Superintendent of police, Mon, Member.

4) Project Director, DRDA, Mon, Member.

5) District Education Officer, Mon, Member.

6) Superintendent of Taxes, Mon, Member.

7) Superintendent of excise, Mon, Member.

8) District Public Relation Officer, Mon, Member.

9) District Transport Officer, Mon, Member.

10) President KNSK, Member.

11) President ANPSA, Member.

12) President KSU, Member.

Croatia-i goal 2-1 agi Switzerland kokogo



St. Gallen, Mongputeni/October 08, 2020 (Agencies): Terepranger 5,000 adenshia ayongba International Friendly asayamung nung, Croatia-i Switzerland madak goal 2-1 agi takok nguogo.

Iba asaya mezüing half nung Switzerland atema Mario Gavranovic-i minute 31buba nung mezüing goal idaktsü. Mezüing half tatemen midfielder Josip Brekalo-i minute 42buba nung Croatia atema goal ka idakja telok ana tsüingda goal 1-1 nung tembang.

Tanabuba half nung, Mario Pasalic-i minute 67buba nung goal tanabuba idakja Croatia-i 2-1 agi Switzerland akok.

UEFA ajanga lateta yutsüba COVID-19 mera ajak nung anidaka, St. Gallen stadium telungi terepranger shilem 30% tashi arudakja iba asaya ayongzüka liasü.

Taoba Brehostibarnü, European soccer indang tented ajanga football asaya reprangtsü atema stadium telungi fans shilem tilaka melatsü lemtet, kasa mapang local tekolakpurtemi iba

telemtetba nung anidaka terepranger melatsü bangjemtep.

COVID-19 wara prokba azüoktsü atema, September 24, 2020 nü Budapest nung Super Cup asaya dak alaka, taküm March ita nungi football asayamung ajak terepranger medeni asayatsü atema UEFA-i tenokdangba agütsü.

Switzerland team nungi Xherdan Shaqiri dak COVID-19 positive putetba ajanga, iba asaya nung pai shilem magitet. Liverpool team nunga Shaqiri-i forward asayar.

French Open: Djokovic o Stefanos semi-final asayatsü

Paris, Mongputeni/October 08, 2020 (Agencies): French Open tebur kija quarter final asaya nung Greek nunger seed pungobuba Stefanos Tsitsipas-i 7-5 6-2 6-3 agi Russia nunger Andrey Rublev tsükdaktsüba sülen, Stefanos-i pa indang tanabuba Grand Slam semi-final tongtetogo.

Court Philippe Chatrier nung Stefanos aser Rublev na masayadang, Hamburg kübok seed 13buba Rublev-i taoba asaya ana tashi nung arishi küm 22 tain Stefanos tsükdakja lir.

Rublev-i pa indang record meraksatsü tebilemba nung, mezüing set 5-4 agi tejakdang ser asaya, saka Tsitsipas, shibai taoba küm Australian Open semi final tongtet, pai Rublev nem maongka magütsüi ajateta asaya aser mezüing set koktet.

Mezüing set nung 3-5 nungi, Tsitsipas-i kanga dang meranga asaya game pungo tashi atonga takok angu aser iba mapang Rublev kanga dang tezütanga kecha mesüteti aküm.

"Iba court nung timtem kecha meli ayong ayonga asayadar. Tanü ni junga asaya metenzük yongjia, asaya koktettsü meranga toktepba atema ni pelar. Koda masüba tensa mapang ka nung süngjema aser tasa amshia asayatsü kanga tongtibang," ta Stefanos-i ashi.

Tanüingba set ana nunga



Rublev-i tasa tajung mamshitetba ajanga, Stefanos-i pa indang serve asemben tashi koktet.

"Paris yimti nung tennis asayatsü ya jangratemtsüka lir. Tarutsü nunga iba asayamung nung shilem agia kü dak aliba sempet tajungtiba amshia asayatsü yongyar," ta Stefanos-i ashi.

"Lanuwa mapang nungi ni Roland Garros asayamung kanga dang jangra repranga aru aser kenü anogobo nia tennis asayatsü mangdang tulu ayu aser tongtibangsa (Court) Philippe Chatrier nung asayatsü kanga dang yongya. Atangji nunga tanü kü mangdang ataloker," ta pai shisem.

Tebur kija final asaya tongtettsü atema Stefanos-i Novak Djokovic den semi-final asayatsü.

Kasa asayamung tebur kija asaya quarter final tanga ka nunga Novak Djokovic-i Spain nunger Pablo Carreno Busta tsükdakja asayamung semi-final tongtetogo.

38buba French Open semi-final tongtettsü atema Djokovic-i Carreno Busta madak 4-6, 6-2, 6-3, 6-4 agi takok angu.

Tan asayamung nung Djokovic-i French Open title tanabuba aser 18buba Grand Slam title takok angutsü tebilemba nung asayadar.

"Ni tashi ajak agüja aser iba den külemi süngjema asayatsüsa aküm. Pa (Busta) asayar tajung ka lir. Pai kangarabo aibelen mesüi toktepba ajanga point angutsü asaya atsülanga liasü. Kasa mapang, ni junga asaya metenzük aser yimya shitak amshia asayatsü mapang agi," ta Djokovic-i ashi.

Ajisüaka, iba asaya mezüing set makokba sülen, world no. 1 Djokovic teka abilen nung timtem aliba ajanga anepaludakja liasü.

Set tanabuba nung Carreno Busta-i break point anaben tashi angutsü maonga angu, saka iba maongka magiteti pa indang serve anaprongla nung takok mengutet.

AIFF-i Indian Women's National Team Camp ayongtsü

Mongputeni/October 08, 2020 (Agencies): All India Football Federation den külemi, taruba küm 2021 January ita Indian women's senior football team-i camp ka ayongtsü tebilemba lir, ta otongdar sangdong ka ajanga metetdaksü. 2019 December ita senior national team tatembangbuba ajurutep, kong parnoki shilem agia aser South Asian Games takok nguua liasü.

Iba sülen, camp ka atema national team khen danga longjemdanga mali. Sentong renemba ama Camp ya January 2021 nung agitetra, küm ka dak tema süia arur sülen, senior national team külemi longjemer training agitettsü.

Taküm January aser February nung, team indang züngsemtemi anogo 22 - Indian Women's League nung shilem agiogo, saka iba sülen parnoki asayamung ka nung danga Masaya arudar.

April ita Camp ka atema team longjemtsü renem, saka linük nung COVID-19 lockdown aliba ajanga, sentong ajak thitsütsüsa kümadok.

Iba lockdown mapang, tanga saisapongertem ama, tetsür team züngsem ajak pei pei kidang training agia liasü.

Osang ajanga angazükba agi, lockdown mapang national

team coach Maymol Rocky-i asayar ajak den mapang shia jembitepa aser ita ana nung team senden khen mesüra anaben tashi ayongzüka agiogo. Item senden nung asayartem indang practice mapang telemsa, yiruba osang (asayar kar danga yirua lira) aser chiyongtsü chia jema temang anepaluba indang jembitep.

Kasa mapang, asayar kar nem practice chart agütsüogo, koba team senden agiba mapang item chart ajanga asayartem asaya yimya nung renlokba aser tang ama tensa mapang iba mapatong yagi asayartem temang anema alitsü aser asaya yimyatem rajema alitsü asoshi teyari agutsüba indang asadanga liasü.

Tesüiba anogo ishika tejakdang, national team senden ka ayonga agiogo.

National Team asayar rongnung, Dalima Chhibber aser Bala Devi nati junga practice asütsü tenzükogo.

India tetsür football asayar rongnung Bala Devi-i bendanglen club ka nung asayatsü mezüing contract anguba mapang nungi, lai Scotland kübok Rangers club nung training agidar. October 18, 2020 nü nungi Scottish League tenzüktsü aser Rangers team-i iba league nung shilem agitsü asoshi renemdar.

Arsenal-i Hale End Academy shibangtsür



Mongputeni/October 08, 2020 (Agencies): Staff züngsem ka dak coronavirus tashidak putetba sülen, Arsenal-i parnok indang Hale End Academy shibangtsüogo, ta sangdong ka ajanga Arsenal-i metetdaksü.

Anüdoklen London nung lapoka aliba Academy, koba London Colony nung Arsenal indang senior training facility tem nungi balaka lir, iba academy nung arishi küm 9 nungi 16 football asayartem tesayuba agütsütsü atema amshir. Iba Academy (Hale End) nungi England football asayar rongnung Ainsley Maitland-Niles aser Bukayo Saka naprongla graduate süa liasü.

"Hale End Academy nungi onok den külemi inyaker staff ka dak coronavirus tashidak

putetba osang jangjatsür aser nüburtem kümzüka yutsütsü atema mera tapet agia onoki iba academy shibangtsür," ta sangdong ka ajanga Arsenal-i metetdaksü.

"Tashidak prokba azüoktsü aser tsüingsü bushitsü atema tanga staff züngsem trok tashi shinga den majurutepdaksüi takdang balala nung anepaludar. Iba tesem meruksü atema Brehostibarnü Hale End Academy shibangtsü," ta Arsenal-i ashi.

"Iba tesashi wara nungi nübur ajak kümzüka ayutsüji ajak dang teinyaktsü tongtibangtiba lir. Tanü tashi nung, tetsür mesüra tebur indang mezüing team squad nungi züngsem ka danga iba tashidak puteta mali," ta kasa sangdong nung shia lir.

BILEM DANGANG

"Shisabulu jagi nü taküm raksatsür ta nai metetdang."